



SAMOSTALNI SINDIKAT DRŽAVNIH SLUŽBENIKA I ZAPOSLENIKA U INSTITUCIJAMA BOSNE I HERCEGOVINE

Broj: 03-50-42/21
Sarajevo, 29.06.2021.godine

STRANKA DEMOKRATSKE AKCIJE BiH

N/r g-din Bakir Izetbegović, predsjednik stranke

HRVATSKA DEMOKRATSKA ZAJEDNICA BIH

N/r g-din Dragan Čović, predsjednik stranke

DEMOKRATSKA FRONTA BiH

N/r g-din Željko Komšić, predsjednik stranke

SAVEZ NEZAVISNIH SOCIJALDEMOKRATA

N/r g-din Milorad Dodik, predsjednik stranke

PREDMET: PROTESTNO PISMO

VEZA : Budžet za 2021. godinu

Poštovani predsjednici,

mediji su objavili vijest da je Predsjedništvo Bosne i Hercegovine usvojilo budžet za 2021. godinu i uputilo ga u dalju proceduru, uz zaključak da se pokrene procedura povećanja najniže plate za policijske službenike i vojnike.

Poznata vam je činjenica da će budžet vrlo brzo biti usvojen u Parlamentarnoj skupštini Bosne i Hercegovine sa ponižavajućom i uvredljivom osnovicom za obračun plate od 475,69, što je kontinuitet od 10 godina omalovažavanja rada i dostojanstva svih zaposlenih u državnim institucijama Bosne i Hercegovine.

Poznata vam je činjenica da zaposleni u državnim institucijama na nižim nivoima vlasti, (entitetskim i kantonalnim) imaju 20 do 30% veće plate za isti posao koji obavljaju u odnosu na zaposlene u institucijama na državnom nivou.

Iz zaključka Predsjedništva BiH proizilazi činjenica, bez obzira što je zaključak teško realizovati do kraja godine u okviru zakonskih procedura, da članovi Predsjedništva raspolažu sa informacijama da u državnim institucijama postoje zaposleni koji rade u policijskim organima i vojsci.

Poražavajuća je činjenica da isti ti članovi Predsjedništva ne znaju da državne institucije čine i državni službenici i zaposlenici koji časno i pošteno obavljaju svoj posao.

Dugogodišnja politika vladajućih stranaka omalovažavanja i urušavanja državnih institucija je dovela do situacije da zaposleni sa svojim ličnim primanjima, **već duže vrijeme, nisu u mogućnosti prehraniti svoje porodice.**

Samohrana majka, higijeničarka, prima osnovnu platu u iznosu od 475 KM. Ona nije u mogućnosti prehraniti svoje dijete, dok ministar kome čisti kancelariju prima platu u iznosu 10 puta higijeničarke, i plus ostale benificije. **Velika sramota gospodino predsjednici.**

Vozač vaših ministara, prima osnovnu platu u iznosu od 760 KM, dok ministar kome je on na usluzi svaki dan u mjesecu, prima 6 puta vozača, i plus ostale benificije. **Velika sramota gospodino predsjednici.**

Svojom kontinuiranom politikom ste doveli zaposlene sa najnižom platom u institucijama na državnom nivou da im je **uskraćeno pravo na život**. Imaju pravo na rad, zaposleni su, ali od plate ne mogu da prežive. Pokušajte gospodo da zamislite kako majka sa djetetom živi sa 475 KM mjesечно.

Kolektivni ugovor tri Reprezentativna Sindikata je dostavljen Vijeću ministara BiH na potpis 13.12.2019. godine. Do danas nismo dobili nikakav odgovor. U svim državama u regionu su potpisani Kolektivni ugovori sa zaposlenim u državnim institucijama. Jedino BiH to nije uradila.

Zbog nepotpisivanja Kolektivnog ugovora doveli ste zaposlene u institucijama na državnom nivou u veoma nesigurnu pravnu poziciju, gdje nisu u mogućnosti zaštiti svoja ljudska prava. Zaposleni žive i rade u stalnom strahu jer nemaju pravni osnov zaštite.

Protestujemo protiv politike vladajućih stranka, koja je destruktivna, diskriminirajuća i omalovažavajuća prema državnim službenicima i zaposlenicima u institucijama Bosne i Hercegovine, a koja traje punih 10 godina.

Protestujemo protiv politike vladajućih stranka, koja ugrožava egzistencijalna ljudska prava i dostojanstvo državnih službenika i zaposlenika u institucijama Bosne i Hercegovine.

Na kraju, napominjemo da ovakav omalovažavajući položaj nećemo više trpiti!

Nadamo se da ćete poduzeti hitne korake na zaštiti državnih institucija BiH i zaštiti ljudskih prava i dostojanstva zaposlenih u institucijama BiH, na način da se prijedlog Budžeta za 2021. godinu ponovo vrati u redovnu proceduru sa osnovicom za obračun plate 535 koja nam je na nezakonit način smanjena prije 10 godina.

Nadamo se da ćete kao vladajuće stranke uticati na Vijeće ministara Bosne i Hercegovine i zatražiti hitno potpisivanje Kolektivnog ugovora.

Očekujemo da ćete, u buduće, dati bezrezervnu podršku u odbrani dostojanstva uposlenih u institucijama Bosne i Hercegovine a samim tim i države Bosne i Hercegovine.

S poštovanjem,

**Samostalni sindikat državnih službenika i zaposlenika u institucijama
Bosne i Hercegovine**

Salih Karčić, predsjednik